

## abetüür am outoschtüür

**Text: Hans Jürg Zingg / Melodie: Hans Jürg Zingg**  
**Begleitimprovisation: Edwin Peter**

erschte gsang: vorbiud

d rittersag vom mittuauter prichtet üs vo abetüür:  
da sy jungi flotti manne unerschrocken uf e wäg  
hei der kampf ufgno gäg mönsche tier u andri ungehüür  
und aus heude hei si gguute sy si heicho gsung u zwäg

het e so nen edle ritter ungerwägs en andre gse  
won ihm unbekannt isch gsy so het är schlöinigscht reagiert:  
"achtung find!" ds visier wird gsänkt vo itz a gi'ts nüt anders me  
weder siigen oder stärke so isch ihm das aatreniert

jitz muesch dyni chraft bewyse die vo dir u die vom ross  
itz muesch zeige was dy panzer was dy lanze leischte cha  
und'im zwöikampf ziesch dys schwärt u füersch der aus entscheidend stoss  
u verlasch dr platz vom kampf aus heud aus siiger churz aus ma

das sy abetüür das sy abetüür das sy abetüür gsi ir ritterzyt  
settig mannbarkeitlechi abetüür liebi lüt di gits no hütt

zwöite gsang: abbiud

trifft im zwänzigste jahrhundert uf der asfautierte bahn  
e bänzinrossritter eine wo ir glyche richtig fahrt  
de ganz plötzlech wird er packt vom auten abetüürerwahn  
un e strassezwöikampf spiut sech ab so rächt nach ritterart

"achtung find voruus!" der puus dä stygt der fuess dä drückt uf ds gas  
u der abstand churzet ungfähr im verhältnis zum verstand  
"achtung find vo hinde!" dänkt dä vor bim blick i ds spieguglas  
i der agriffposition verglycht me d waffe mitenand

das sy abetüür das sy abetüür das sy abetüür am outoschtüür  
das sy mannbarkeitlechi abetüür i dr ritterzyt vo hütt

dritte gsang: findbiud

"Lahme siech het mit sym merz zwöihundertfüz en achzger druff  
u drby chönntsch hundert has doch tänkt e schtumpetyp mit huet!"  
"Was e mini wott mi hole settig mache mi de muff  
um ds verrecke hundert fahre find i sowiso nid guet!"

so geits wyter no nes zytli i däm stumme dialog  
jede bout es findbiud unghüür stimulierend vor sech uf  
jede gseht sich säuber aus erfahrne outopsycholog  
und nimmt jitz dr kampf nach autbewährter fahrertaktik uf

das sy abetüür das sy abetüür das sy abetüür am outoschtüür  
das sy mannbarkeitlechi abetüür i dr ritterzyt vo hütt

vierte gsang: taktik

dä im mini kennt di strecki wi der eget hosesack  
u dä heimvorteil dä macht ne tonnersstouz u cheibe fräch  
dä im merz dä fahrt - är ghärt zum usserkantonale pack -  
z erschtemau dür ds tau het aber viu me PS undrem bläch

vor de kurve geit dr merz vom gas - me weis ja nie was chunnt -  
mini wird verrückt är gseht genau da gieng's mit achzg no lang  
"s isch doch schad für dzyt vrdammt was isch das für ne lahme hund  
nach dr kurve klar da schautet de dä aff i vierte gang"

das sy abetüür das sy abetüür das sy abetüür am outoschtüür  
das sy mannbarkeitlechi abetüür i dr ritterzyt vo hütt

fünfte gsang: beschimpfig

"potz du zwärg di wiu i lehre derewäg e riis azgryfe  
gäu di tuen i schön verseckle hütt wird eis nid überhout  
s schadt dr nüt we mau nid aues tanzt nach dyre blöde pfyffe  
s schadt o nüt we so ne stuure raser mau ke unfau bout"

"so ne feigling so ne burschua so ne schysskapitalischt  
muesch nid meine chönnsch mi mit dyr blöde taktik k-o schla  
einisch ha di de uf sicher einisch wird de fürezischt  
u zwar chas win i das gse gar nümm so lang bis denn me ga

das sy abetüür das sy abetüür das sy abetüür am outoschtüür  
das sy mannbarkeitlechi abetüür i dr ritterzyt vo hütt

sächste gsang: entscheidig

dört bir nächscte doppukurve gseht me hingedrann chunnt nüt  
mini schautet zrügg är weis we's itz nid geit isch's abvrheit  
merz geit wi scho geng vom gas wott lieber nüt risgiere hütt  
u jitz lue wi mini blinket hornet gas git füregeit

ja i weis dir aui dänket das chönn doch nid guet cho so  
sicher syg grad i der kurve irgend öppis schlimms passiert  
leider mues nech schwär enttüsche: mini läbt u houts drvo  
merz fahrt wyter ziet am stumpe macht e lätsch u isch fruschtriert

das sy abetüür das sy abetüür das sy abetüür am outoschtüür  
das sy mannbarkeitlechi abetüür i dr ritterzyt vo hütt

letschte gsang: belehrig

denn di chlyne abetüürli undrem stärn vom autogott  
ände nume säute tödlech sy's o spili mit em tod  
jede kämpft gäg bösi finde doch der aerbösischt find  
isch im grund gno geng der löu der aut wo in ihm säuber spinnt

(entstanden 1985/87)